

每週經課朗誦經文(巴克禮台語漢字)2014/09/28

共同經課 - 1 出埃及記十七章一節~七節

1 以色列人全會趁耶和華的命令，照路對汛的曠野進前行，佇利非訂紮營。百姓無水通飲，2 百姓就及摩西計較，講：「互阮有水通飲！」摩西給in講：「恁啥事及我計較？啥事試耶和華啊？」3 百姓佇遐真嘴乾，愛飲水，就哀怨摩西，講：「你啥事導阮對埃及上來，互阮及阮的子兒，阮的精牲攏嘴乾死啊？」4 摩西就求叫耶和華講：「我對此個百姓欲怎樣做啊？in差不多欲用石頭擲我。」5 耶和華給摩西講：「你做百姓的頭前行，導以色列的長老幾若人及你去，你的手著抬前日拍河水的拐仔。6 看啊，我欲倚佇你的面前，佇何烈的石磐頂。你拍彼個石磐，欲有水對遐流出，互百姓飲。」摩西就佇以色列長老的面前按呢行。7 伊名彼個所在叫瑪撒，閣叫做米利巴；因為以色列人計較，閣因為in試耶和華，講：「耶和華佇阮中間抑無？」

共同經課 - 2 詩篇七十八篇一節~四節，十二節~十六節

1 〔亞薩教示的詩。〕我的百姓啊，恁著聽我的教示，俯耳孔聽我的嘴的話。2 我欲開嘴設譬喻；我欲講出古早隱密的話，3 就是阮所聽見、所知的，亦是阮的祖公傳互阮的。4 阮無欲將諸個事對in的子孫隱瞞，欲將耶和華的名聲及伊的權能，以及伊所行奇妙的事，傳互後世代。12 伊佇埃及地，瑣安的田，佇in祖公的目矚前行奇異的事。13 伊分開海，互in過去，閣互水豎起來，親像土堆。14 伊日時用雲導in，通暝用火的光導in。15 伊佇曠野互石磐裂開，互in多多水通飲，親像對深淵出。16 伊互水對石磐滂出，互水親像江河流落。

共同經課 - 3 腓立比書二章一節~十三節

1 所以，若佇基督有甚麼勸勉，抑是甚麼仁愛的安慰，抑是有聖神的甚麼交通，抑是有甚麼慈悲憐憫，2 恁著互我的歡喜充滿，就是同心志，同仁愛，心神和合，心志專一。3 凡事莫得為著結黨，抑是為著空空的榮光來做；獨獨大家用謙遜的心，看別人卡贏佇本身。4 恁逐人莫得顧家己的事，也著顧別人的事。5 恁著有基督耶穌的心做心：6 伊本有上帝的形狀，無掠及上帝平等做所著執守的；7 反轉傾空家己，取奴僕的形狀，成做人的樣相；8 已經有親像人的款式，就屈家己，順服到佇死，甚至死佇十字架。9 所以，上帝高升伊極高，賞賜伊彼個名搬(pôaⁿ)過佇萬名的頂面的，10 互見若佇天、佇地，及佇地下的，佇耶穌的名無一個腳頭窩毋跪拜，11 無一個嘴毋稱呼「耶穌基督做主」，來歸榮光父上帝。12 所以，我所疼的兄弟啊，親像恁曾常常順趁，毋若佇我及恁佇啲的時，就現今我無及恁佇啲，益發著用驚惶愕愕來做成恁家己的得救。13 因為恁有彼個意願，有彼個所行，攏是對上帝為著伊的好意來行佇恁心內。

共同經課 - 4 馬太福音二十一章二十三節~三十二節

23 耶穌入殿，教示人的時，諸個祭司頭及百姓的長老就近伊講：「你用甚麼權行諸個事？閣是誰互你此個權？」24 耶穌應講：「我亦有一句話欲問恁，恁若給我講，我才欲給恁講我用甚麼權行諸個事。25 約翰的洗禮是對叨落來？是對天？抑是對人？」in私奇議論講：「若講『對天』，伊欲給咱講：『按呢，恁啥事毋信伊？』26 若講『對人』，咱又驚百姓，in攏掠約翰做先知。」27 就應耶穌講：「阮毋知。」伊就給in講：「我亦無欲給恁講我是用甚麼權行諸個事，總是恁拍算怎樣？」28 「人有二個子。就近彼個頭一個講：『子啊，今仔日去葡萄園做工。』29 應講：『我毋』，後來反悔，就去。30 閣就近第二個亦按呢講。應講：『主啊，我欲』，就竟然無去。31 此二個叨落一個行老父的意思啊？」in講：「頭一個。」耶穌給in講：「我實在給恁講，諸個抽餉的及娼妓代先恁入上帝的國。32 因為約翰佇義的路就近恁，恁無信伊；抽餉的及娼妓就信伊，閣恁看了亦無反悔去信伊。」